

# Davart igl engirament della brev dellas Treis Ligias : 1650-1674

Autor(en): **Maissen, Felici**

Objekttyp: **Article**

Zeitschrift: **Annalas da la Societad Retorumantscha**

Band (Jahr): **72 (1959)**

PDF erstellt am: **17.07.2024**

Persistenter Link: <https://doi.org/10.5169/seals-224351>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

---

# Davart igl engirament della brev dellas Treis Ligias

1650 — 1674

da Felici Maissen

Ils 23 de settember 1524 han las Treis Ligias reticas engirau lur emprema brev federala. Quei document, che ei de considerar, sco constituziun della republica di en siu artechel 25, che la brev della Ligia dueigi vegnir engirada danovamein mintga dudisch onns. Igl ei grev de constatar, schebein quella prescripziun ei vegnida observada reglarmein duront ils emprems decennis. Nuotatonmeins selai ei demonstrar che las Treis Ligias han repetiu igl engirament della brev anno 1544 e silsunter da temps en temps, cunzun en dis malruasseivels e prigus per la tiara. Igl onn 1621 ei la Ligia Grischa vegnida obligada a fideivladad confederala entras engirament della numnada brev e quei pervia de sia alianza separatistica cun la Spagna. Suenter la sollevaziun della Portenza digl onn 1622 ei vegniu prestau in general sarament della veglia brev federala. E 1624 han las Otg Dertgiras repetiu quei engirament.

Els onns 1649/50 revevan grevas dispetas confessionalas e politicas el stat retic. Da vart protestanta ei vegniu insinuau e schizun pretendiu in general engirament della brev della Ligia en tuts cumins della republica. La part catolica ha immediat fatg resistenza e renviau deschartamein quella pretensiun, essend ch'il paragraf 31 della brev della Ligia cunteneva la clausula, ch'ils artechels «Quasimodogeniti», fatgs igl avrel 1524 a Glion, seigien cumpri. Ultra de quei duevan era ils artechels de Glion de 1526 puspei vegnir engirai. Fertan ch'ils emprems artechels restrenschevan gia ils dretgs della Baselia e digl uestgiu, cuntenevan ils secunds recentas mesiras encunter l'immunitad ecclesiastica ed encunter ils dretgs seculars e spirituals digl uestgiu; gie, els attaccavan schizun verdads della veglia cardientscha e muntavan ton sco ina reconuschientscha della nova ductrina.

Ils catolics ein sedeclarai prompts d'engirar las veglias brevs, denton mo aschilunsch sco quellas pertuccavan fatgs seculars e politics. En quei combat han il nunzi apostolic e schizun las pussonzas jastras susteniu energicamein igl uestg, il capetel catedral ed il Corpus Catholicum. La curia romana ha buca mo senezegiau digl agid dils nunzis a Madrid ed a Vienna, mobein perfin dil sustegn dil guvernatur de Milaun, dil retg della Spagna e digl imperatur. Il nunzi apostolic en Svizzeria ha scret ina suarada protesta encunter la fuorma digl engirament per mauns della dieta generala a Tavau. Ins ha denton buca prelegiu la protesta, essend che la damonda ei buca vegnida tractada en lezza sessiun. Muort la resoluta resistenza della partida catolica ei la brev della Ligia lu buca vegnida engirada.<sup>1</sup>

Ils onns suandonts vegn la damonda digl engirament della brev della Ligia adina puspei tratga a strada, aschiprest sco las partidas seschavan en pli u meins complicadas dispetas confessionalas ni politics. Els embrugls han buca fatg spetgar ditg. Els entscheivan gia igl onn 1653 a caschun d'ina violenta occupaziun della claustra de S. Clau a Cuera, continueschan pervia d'ina agitaziun confessionala 1665 e duront las discrepanzas de tempra politica ed ecclesiastica dils onns 1672/74.

Igl onn 1653 penetreschan enzacons catolics en la claustra dominicana de S. Clau a Cuera. Els vulan sepatrunar dil priur della claustra, Gion Maria Bass, e pretender da quel plaid e fatg pervia de maltractaments enviars in frar laic ch'era per quels motifs fugius e mitschaus silla Cuort. La fuigia reussescha era al priur. Igl uestg intervegn il fatg e fa pustar ad interim ina guardia de tschun umens en claustra. El incumpensa plinavon il caplon Elias Ziegler de far in inventari della claustra. Mo ussa capeta enzatgei nunspetgau. In diember burgheis reformai, armai da sum tocca dem, rumpa en claustra, fugenta las guardias ed il caplon. La truppa occupaescha il convent, disfa ils altars e dismetta ils maletgs, detscharta de buca render pli la claustra.

---

<sup>1</sup> Arisguard questa introducziun mira mia lavur «Die Auseinandersetzung um die Beschwörung des Bundesbriefes 1649/50» comparida en «Bündner Monatsblatt» 1956, numers 8/9, pag. 248 — 267, en special pag. 248/49 cumpriu las annotaziuns.

Quei act violent ha irritau il pievel catolic dell'entira tiara. Igl uestg spargna neginas breigias per survegnir anavos la claustra. La Ligia Grischa — per gronda part catolica — ils tschun cantuns catolics e la finala era igl imperatur han susteniu quellas emprovas, mo tut adumbatten. Il marcau de Cuera temeua ina attacca davart dils catolics ed ha fatg rinforzar las guardias. Il cussegl dil marcau ha en in messadi a tuttas vischnauncas dellas Treis Ligias dumandau che tuts cumins *prestien igl engirament della brev della Ligia*. Anno 1658 ha il marcau de Cuera sunter liungas tractaziuns cumprau la claustra de S. Clau per 11 000 flurins.<sup>2</sup>

Cuort sissu ei l'uiara de purs rutta ora el cantun Bern. Las Ligias reticas ein vegnidas clamadas en agid e duevan — tenor convenziun — tarmetter in succuors de 2000 umens. Quels duevan serimnar a Zir. All'entschatta han ils grischuns mussau pign interess, mo la finala ei tonaton vegniu mobilisau 1000 umens. Ils cumins catolics della Cadi, Lumnezia e Sursaissa han snegau lur agid als confederai per aschi ditg ch'il marcau de Cuera restitueschi buca la claustra de S. Clau. Quella reserva mo augmenta l'irritaziun da mintga vart. Ins smanatscha perfin cun las armas. La dieta generala de Tavau ha puniu ils treis cumins renitents cun 1000 flurins, ina summa che dueigi vegnir pagada enteifer sis meins e silsunter repartida als auters cumins. Ins haveva schizun prevediu de sclauder ils treis cumins dallas Ligias e de privar els da tuts dretgs e da tuttas entradas, per cass ch'els veglien buc acceptar il castitg. Da vart protestanta han ins *danovamein pretendiu igl engirament della brev della Ligia*. Ils catolics ein sedustai cun tutta forza ed ein — sco anno 1650 — sedeclarai promts de far il sarament mo aschi lunsch sco la brev partegn caussas purmein politicas e buca religiosas ni ecclesiasticas. Ils de priedi insistan sin tut, vul dir sin la fuorma d'engirament dils anno 1544.<sup>3</sup>

---

<sup>2</sup> Archiv federal Bern, copias da Vaniescha, tom 64 pg. 410, 443, 471; tom 65 pg. 25. Archiv episcopal Cuera, rapport dil magister Elias Ziegler sur l'occupaziun della claustra dils 23 de fevver 1654. Plinavon: Joh. Georg Mayer, Geschichte des Bistums Chur, II p. 395 s. — Paul Gillardon, Nikolaischule und Nikolaikloster in Chur im 17. Jh., Schiers 1907 pg. 54 — 62. — F. Jecklin, Materialien zur Standes- und Landesgeschichte I, Regesten, nr. 1761 IV, 1763, 1764.

<sup>3</sup> Archiv federal Bern, copias da Vaniescha, tom 64 p. 463; tom 65 p. 25, 35, 97, 98. — Arisguard l'uiara de purs: Archiv cant. Cuera, Landeskarten A II LA 1, ils 8, 11, 19 e 21 de matg 1653. — Jecklin, Materialien I, nr. 1762, 1765 — 1769. — P. Gillardon, Nikolaischule, p. 75 ss., 80 s.

Igl engirament ei buca daventaus realitad. La disfidonza confessional ha aunc cuzzau onns ed onns. Il november dil medem onn han per semeglia las mistronzas (Zünfte) de Cuera concludiu de scatschar ord il marcau tuts «hinderses» catolics sco era las giuvnas de priedi che maridan catolics.<sup>4</sup>

Entuorn 1661 han ins danovamein anflau ina caschun per puspei pretender la renovaziun digl engirament. La situaziun era la suandonta: Strusch ein las undas della dertgira nauscha de 1659/60 sur enzacons menaders della partida spagnola sequietadas, ch'in niev e furius moviment sesaulza en Portenza. Ils Partenascs — aschia secloma ei adina els acts — adherents della partida franzosa en Portenza, eran apparentamein malcuntents dil resultat della dertgira nauscha. Els garegian dagl ambassadur spagnol Francesco Casati il prompt pagament de restonzas dil «daner dil Steig», de pensiuns e d'autras pretensiuns. Els smanatschan de sepatrunar dils signurs Ambrosi Planta e colonel Rosenroll e de sfurzar quels cun il tgierl de render in quen detagliau concernent l'applicaziun dils daners spagnols ch'els hagian retschert.<sup>5</sup>

---

<sup>4</sup> Jecklin, Materialien I, nr. 1771 s.

<sup>5</sup> Archiv federal Bern, copias da Milaun, Trattati, Svizzeri e Grigioni 8, rapports de Casati dils 24 de fevrer, dils 8 e 29 de mars 1661.

Archiv episcopal Cuera, Politische Akten 1600 — 1700, extracts da dr. Ant. de Castelmur ord la biblioteca Ambrosiana ed archiv statal Milaun (el suandont vegnan quels documents citai mo cun «Pol. Akten»), rapports de Casati a Milaun dils 8 e 22 de mars e dils 25 d'avrel 1661 pg. 301, 303, 307. El rapport dils 22 de mars scriva Casati: «... Questi Partenzaschi inquieti non cessano di travagliare me et altrui, minacciano di volersi adoperare della persona di Ambrosio Planta e di Rosirola per fargli cantare con li tormenti come siano state governate le cose del paese; di voler mandare quantità di popolo da me per esser pagati di loro crediti liquidi verso la regia camera, e protestarmi il capitolato: di volere la reforma del paese e del governo e per procacciare tutto questo di fare una sollevazione.»

Ambrosi Planta era in feagl de dr. Johann Planta de Razén e beadi de dr. Joh. Planta, ch'ei vegnius scavazzaus 1572 pervia d'haver obteniu dal papa bullas cun plenipotenzas. Ambrosi Planta ei staus landrechter, e suenter esser seccaus a Malans, cau della Ligia dellas Diesch Dertgiras (Historisch-biogr. Lexikon der Schweiz 1926, tom V pag. 450).

Rosenroll: Probabel setracta ei de Cristoffel Rosenroll, compartisan de Gieri Jenatsch, compliz dil mazzament de Pompeius Planta 1621 e delegau per il capitulat de Milaun 1639. Forsa vegn era siu feagl Pieder en damonda, podestà a Trahona 1645 (Hist.-biogr. Lexikon V pag. 703).

Davos quei moviment steva la Frontscha e siu ambassadur a Soloturn, de la Barde, che encureva d'acquistar ils grischuns per ina allianza cun la Frontscha. El Grischun stattan ils partisans franzos el survetsch digl ambassadur de la Barde, oravontut ils Salis, il marschal Ulisses e siu frar capitani Carli de Salis, plinavon Hercules de Salis. Quels umens pretendan oravontut: il prompt pagament dils castitgs pronunziai dalla dertgira nauscha, la reforma della regenza, *igl engirament della brev della Ligia*, il rendaquen dils ufficials en Valtlina ed ina delegaziun alla dieta de Baden (pervia de damondas dil capitulat de Milaun). Lur vera finamira ei denton: slihaziun dil capitulat de Milaun ed ina allianza cun la Frontscha. Ils rebels emprovan de schendrar confusiun denter il pievel, tarmettan agitatur e stigaders els cumins e vischinadis. Exteriuramein compara in Clau Flütsch sco capo-actur.<sup>6</sup> Ils Salis han daners e pagan de beiber. L'agitaziun sederasa e tschaffa ragischs era en auters cumins, sco en la Foppa e Lumnezia, a Tusaun, ell'Engiadina bassa ed a Zir. Tscheu e leu tschaffan ils purs gia las armas ed ein decidi de deponer quellas pér cura ch'ils sentenziai della dertgira nauscha seigien mess en fermenza e sfurzai de pagar ils castitgs. E veramein, els secalman pér cura ch'ils sentenziai han dau la declaronza categorica de pagar tut enteifer 15 dis.<sup>7</sup>

La partida spagnola sedosta mordio. La tema ni il suspect ch'ils Salis savessien empruar d'obtenir il regiment sur la Valtlina dat niev impuls als partisans spagnols. Alla fin han de la Barde e ses trabants giu negin success, pertgei igl avrel 1662 ein tuts cumins — cun ex-

---

<sup>6</sup> Archiv federal Bern, Trattati 8, rapports de Casati dils 31 d'uost, 1 de sett., 4 de nov., 15 de nov. 1661, dils 3, 18 e 19 de schaner, dils 15 e 22 de fevrer 1662. — Archiv episcopal Cuera, Pol. Akten, rapports de Casati dils 31 d'uost, digl 1 de sett., dils 15 de nov. 1661 e dils 3, 18, 19 de schaner, dils 15 e 22 de fevrer 1662 pag. 311, 313, 317, 319, 321, 323, 327 e 329. — Plinavon Jecklin, Materialien I nr. 1819 — 1821. Alexander Pfister, Partidas e combats ella Ligia Grischa da 1494 — 1794, sep. dellas Annalas 40, Cuera 1925, pag. 38. Flütsch ei ina schlatteina de Schiers - St. Antönien-Luzein, numnada all'entschatta dil 16avel tschentaner cun divers mistrals ed ufficials de cumin (Hist.-biogr. Lexikon III pag. 184).

<sup>7</sup> Archiv federal Bern, Trattati 8, rapports de Casati dils 8 e 15 de mars 1662. — Parallel, archiv episcopal, Pol. Akten, ils medems rapports pag. 331, 333.



cepsiun de treis — sedeclarai pil manteniment dil capitulat de Mi-laun de 1639. Sin quella moda ha la Frontscha retschiert in canaster.<sup>8</sup>

El decuors de tut quels manischems ei vegniu fatg repetidas instanzas per far engirar la brev della Ligia. Quellas paran denton, a nies saver, de haver menau a neginas ulteriuras tractaziuns, nundir ad in success.<sup>8a</sup>

Igl onn 1665 porta danovamein in malruaus — quella gada en fatgs confessionals. E puspei ei la damonda digl engirament della brev vegnida ventilada. In innocent, mo nuotatonmeins remarcabel schabetg, ha dau la caschun leutier. Aschi naivs sco el para, el havess tgunsch sayiu purtar prigulusas consequenzas. La stad 1665 ein dus paders caputschins fruntai sin via denter La Punt e Cuera cun in um della Muntogna (Heinzenberg); quel, in cert Paul Nicca, sedeva per parents de Gallus de Mont dil casti de Schluein. Ei para ch'ils paders ein s'exprimi sin via en moda fetg malprudenta enviers Nicca ed enviers ils protestants insumma. Pertgei cuort sissu raquenta igl um de Muntogna, ils caputschins hagian detg ch'ils catolics vegnien a surprendre ils reformai cun las armas ed extirpar els. La fama sederasa sco in fiug sfrenau ell'entira republica. A Cuera ed ora sin la tiara regia ina immensa irritaziun. Ils caputschins ed il de Muntogna ein buca ditg suenter vegni examinai exactamein e confruntai en inquisiziun, gl'emprem avon ils canonis e sissu dal landrechter della Ligia Grischa che sesanflavan ual a Cuera. Egl interrogatori ein las duas parts secunterdetgas. L'inquisiziun ha buc anflau bia de vaglia en quei cass. Per quietar ils spérts serenda il decanatedral dr. Mathias Sgier gl'emprem tier il burgameister dil marcau e suenter tier il congress ual radunau. Da vart catolica competente han ins ultra de quei

---

<sup>8</sup> Archiv federal Bern, copias da Vaniescha, tom 71 pag. 146, rapports digl ambassadur venezian a Turitg, Sarotti, dils 29 d'avrel 1662, p. 146. — Jecklin l. c. nr. 1823 e 1824.

<sup>8a</sup> A caschun dell'elecziun digl uestg Duri de Mont 1661 encurevan ils predicants de far engirar il niev uestg la carta della Ligia (Archiv federal Bern, copias da Vaniescha, tom 71 p. 39). Arisguard autras instanzas: Archiv fed., Trattati 8, rapport de Casati dils 4 e dils 15 de nov. 1661.

sincerau ils deputai dil congress de saver nuotzun dils plans hostils. Ils signurs de l'otra confessiun ein stai cuntents de quella risposta.

La sinceraziun ha sco ei para calmau mo ils mess dellas Ligias. Autras vuschs, cunzun ora sin la tiara, han continuau a derasar la fama e quei en moda stravagada. Igl entir moviment va dil reminent bein a prau cun la quasi innata disfidonza confessionala che regeva gia da decennis e decennis enneu; el corrispunda era buca mal al spért superstizius de gliez temps. Tscheu e leu ha il pievel entschiet a murmignar enviers las autoritads: Ins hagi mo mirau atras la detta, enstagl far daditschert ad uras en quella caussa. Entras quella passivitat vegnien la segirezia della tiara ed il beinstar communal periclitai. Plaunsiu vegnan schizun ils signurs regents sezs suspectai ed ei va las tunas ch'ils catolics movien gia las armas.

Quei malruaus nervus dil pievel vegn aunc augmentaus entras la patarla malponderada d'in giuvenaster de Bischofszell, numnaus Barclamiu Schönenberger. Quel haveva passentau ina notg en in'ustria sil Pass S. Glieci. La damaun sissu ha il giuven, sco ei para, — e quei en preschientscha d'otra gliעד — detg alla survienta pauc bien dils reformai: Ils caputschins vegnien segir a procurar ch'ins fetschi ina fin cun ils de priedi. Ils paders hagien gia benediu las ballas e procurau per auters agids «celestials».

Quellas tschontschas han spert fatg la curella tras vals e vallas. Quei niev eveniment ei immediat vegnius mess en connex cun la fama dils dus caputschins e digl um della Muntogna. Il giuvenaster vegn arretaus e menaus a Maienfeld avon dertgira. Il castellan (Landvogt) dil liug tarmetta igl arrestant a Cuera per l'inquisiziun, secarrend ch'ils dus schabetgs numnai stettien senza dubi en stretga relaziun in cun l'auter. A Cuera han treis inquisiturs — in deputau per Ligia — interrogau il Barclamiu Schönenberger. Quel ha concediu de haver inventau tuttas pretensiuns. Quellas seigien faulsas ed hagien de far lidinuot cun gl'auter cass. Turnentaus da Cuera a Maienfeld, ha il pauper schani stuiu passar leu ina secunda inquisiziun e far enconuschientscha cul tgierl. Il turmentau ha denton buca palesau enzatgei de niev, era buca suenter la secunda e tiarza tortura. Tenor la sentenza della dertgira dueva el vegnir mislaus ed ultra de quei schar tagliar giu in 'ureglia. Essend vegniu fatg ina instanta damonda



de grazia, ha il delinquent alla fin buca stuiu unfrir l'ureglia, mo ei sulettamein vegnius scudihaus cun tortas.<sup>9</sup>

Quasi el medem temps fa ina tiarza fama la curella ed irritescha ils spérts sil pli ault: Ins raschuna che truppas armadas s'avischinien da notg suenter il Rein enasi encunter ils confins grischuns. Era quei ei semussau per pura imaginaziun.<sup>10</sup>

Il congress dellas Treis Ligias radunaus da quellas uras a Cuera pren posiziun en quellas famas che fan sensaziun ella tiara. El elegia nov umens — treis ord scadina Ligia — che dueigien encurir igl origin de tuttas tschontschas, sinaquei che tut tgi che annunzia e propaga talas tunas vegni traplaus e la pasch della republica buca pli periclitada. Ils babs della tiara han era supplicau ils superiors ecclesiastics e laics d'esser gideivels en quella acziun. Ultra de quei concluda il congress, che mintga dertgira aulta hagi d'eleger silmeins dus umens per prevegnir e dismetter las famas prigulusas.<sup>11</sup>

Ils eveniments numnai havevan commoviu profundamein il pievel. Glion ha fatg rinforzar las guardias dil marcau. Ils de Cuera levan a dispet prender armas e muniziun ord igl arsenal.<sup>12</sup> Igl ambassadur spagnol Casati temeva quellas interpresas che eran en verdad zun prigulusas. Sin siu giavisch ha il capitani dil marcau (capitano della città) buca lubiu d'arver igl arsenal. Casati ha remunerau quels survetschs cun in regal de 20 dublonas ni 400 liras.<sup>13</sup> Il marcau ha en sia irritaziun schizun fatg pustar guardias sin ni silmeins el contuorn della Cuort, supponend che l'attacca vegni da leu anora, sche la fama duess severificar. Casati ha puspei intermediau ed aschia ein las guardias prest vegnidas retratgas.<sup>14</sup>

---

<sup>9</sup> Partenenent il sura schabetg compareglia mia publicaziun en «**Bündner Monatsblatt**» 1955 nr. 1 p. 22 ss.: Ein gefahrdrohendes Gerücht und die Landesobrigkeit im Jahre 1665. — Plinavon: **archiv federal Bern**, Vaniescha, rapports digl ambassadur Francesco Giavarina dils 22 e 29 d'uost, dils 12 e 26 de sett. 1665 pag. 101, 103, 106, 109.

<sup>10</sup> **Archiv episcopal**, Pol. Akten p. 377, il castellan de Maienfeld al bürgameister de Cuera, dils 26 d'uost 1665. — **Bündner Monatsblatt** 1955 p. 26.

<sup>11</sup> **Bündner Monatsblatt** 1955 pag. 26 s.

<sup>12</sup> **Archiv episcopal Cuera**, Pol. Akten, rapport de Casati, dils 12 d'uost 1665 pag. 379.

<sup>13</sup> l. c. Gliesta de pensiuns per 1665 p. 399.

<sup>14</sup> l. c. rapport de Casati dils 12 d'uost 1665 p. 380.

Malgrad tuttas emprovas de quietar ils avdents dil marcau, vulevan els buca secalmar. Ins ha concludiu de catschar giuadora las 23 famiglias catolicas sesentas el marcau e senza il dretg de burgheis. Ins ha plinavon garegiau igl *engirament della brev della Ligia* e plidau de bandischar tuts paders caputschins. Tschelluisa detti ei in'uiara de confessiun.<sup>15</sup>

En cercchels catolics patertgavan ins gia de separar ils Cumins catolics dals reformai e de formar ina atgna Ligia. Casati deva tutta pussevla breigia de scatschar tals plans che vessan senza dubi giu grevas consequenzas pil stat de Milaun e pil capitulat de 1639. Per mantener igl uorden ha Casati era supplicau la regenza de Puntina (Innsbruck) da pustar truppa a Gutenberg ed ella vischinonza dils confins grischuns.<sup>16</sup>

Ord l'Engiadina retscheiva il burgameister de Cuera ina brev, en la quala ils de Surtasna dian aviartamein ch'ins vegli derscher la presenta regenza suspectada da malfideivladad enviers la segirezia della tiara: Il pievel seigi irritaus dellas nauschas tunas; ins vegli haver clarezia. Tschelluisa vegnien ins a survegilar sez igl agir dils signurs che mondien entuorn aschi lom culs papists, sco a sias uras el cass Guler, e quei cun spir risguard dils de messa.<sup>17</sup> Era il predicant de Cuera stiga aviartamein sin scantschala — rapporta Casati a Milaun — e quei senza dubi per alla fin reussir in general engirament della brev della Ligia.<sup>18</sup>

<sup>15</sup> l. c. rapport de Casati dils 2 de sett. 1665 p. 383. — Jecklin I, Materialien nr. 1836 III.

<sup>16</sup> Archiv episcopal l. c., rapport de Casati dils 7 de sett. 1665 p. 388. «... et cherchisi di impedire con ogni puotere la separatione che vanno motteggiando di voler pretendere li cattolici con fare un corpo di governo totalmente diviso da Protestanti come cosa impraticabile senza l'intiera rovina di tutto queste paese...»

<sup>17</sup> l. c. rapport de Casati dils 29 de sett. 1665 pag. 391, ed annexa copia della brev dils de Surtasna al burgameister de Cuera. La conclusiun de quella secloma: «... li quali (ils vischins de Surtasna) vorebbero totalmente sollevarsi et visitare medesimi gli affari et guardare stessi nella olla ciò che si faccia cocciare dalli signori grandi et non aspettare parole molli, ma la verità stessa, perche diffidono alli signori, che siano troppo molli con li papisti e che si porti per indulto alli capitani di quello si ha portato rispetto, o sia indulto al Guler per riguardo delli papisti. sig. Andrea Durietto, hora Landamanno d. drittura di Sopra Tasina.

<sup>18</sup> l. c. rapport de Casati dils 29 de sett. 1665 p. 389. «... ardi il predicante principale di questa città esagerare in pulpito senza dubio per concitare all'esecutione del Pundtsbrief et perciò atterito insieme detto borgomastro dalla cognitione ch'egli ha delle passate emozioni e rovine...»

Mo era ils catolics garegian muniziun da Casati. Quel denton, per-tscharts della prigusadad d'in tal giug, ha renvieu lur pretensiun. Sco Casati scriva vegn ei en general dumandau igl engirament della brev della Ligia, e quei senza provocar ina totala sclavinaziun dellas vicendeivlas relaziuns. Mo ils tschochentai, sco ils Salis, eran buca dil medem meini: Il pievel dil marcau ed era d'enzacontas vischnaucas selaschi buca quietar schi tgunsch, era buc entras las determinaziuns dil capitulat.<sup>19</sup>

Ils medems dis emprovan ils partisans franzos de gudignar terren, e Casati selamenta ch'ils Salis cumprien tuts uffecis a Maienfeld. Tut priu regeva ei anno 1665 ina tensiun tut apparti, ton en fatgs politics sco confessionals.<sup>20</sup>

Alla fin settember dil medem onn ei igl arciduca Sigismund de Puntina (Innsbruck) morts. Las Treis Ligias tarmettan ina delegaziun agl imperatur per condolar e sincerar el d'ina amicabla vischinonza stata.<sup>21</sup> Ils 22 d'october perencunter scriva igl uestg de Cuera ch'ils reformai hagien delegau a Puntina il cancellier dil marcau ed ils catolics il Gion de Travers d'Ortenstein. Podà che quei ei stau ina ulteriura delegaziun. L'instrucziun en scret per missiun dil Travers cuntegn la supplica, ch'igl imperatur vegli surprendre la protecziun digl uestgiu e far frunt ad eventualas tentativas dils reformai.<sup>22</sup>

La damonda digl engirament della brev della Ligia ruaussa uss per 6 — 7 onns — ton sco ei selai concluder ord ils documents — per puspei comparer sco ina malsogna cronica e quei a caschun dils nauschs embrugls confessionals e politics dils onns 1672—74.<sup>23</sup> La dispeta ei vegnida provocada, perquei ch'il nunzi apostolic, Eduardo Cybo, ha installau anno 1672 ils paders caputschins ella pleiv pari-

19 l. c. rapport de Casati dils 29 de sett. 1665 p. 390. — Jecklin, Materialien I nr. 1836 III, 1837.

20 Sur la situaziun della politica dellas partidas de quei onn comparegia Al. Pfister, Partidas e combats p. 39 s.

21 Jecklin, Materialien I nr. 1838.

22 Archiv episcopal l. c., brev digl uestg de Cuera agl imperatur p. 395.

23 Questa dispeta ei vegnida discuvretga e descretta da dr. Ant. de Castelmur ed ei cuntenida el tierz capetel de sia monografia sur Landrechter Nikolaus Maisen, comparida en «Jahresbericht der hist.-ant. Gesellschaft v. Graubünden» 1928, e stampau separat tier Sprecher Eggerling, Cuera 1929. Las suandontas expectoraziuns sefundan — leu nua ch'ei vegn buca indicau autras fontaunas sin la numnada lavur de Castelmur, separat pag. 31 — 56.

tetica de Tumeagl. Ils caputschins eran gia dapi decennis ina spina els egls dils reformai. Grazia alla mediaziun dils confederai ei vegniu fatg igl onn 1647 ina convenziun, tenor la quala ils caputschins devan vegnir retratgs dallas pleivs pariteticas. Ils cumins havevan denton aunc buca ratificau il contract, ch'ils reformai ein gia sefatgs culpents de violenzas enviers la claustra de Churwalden. Ils catolics ein senezegiai de quei surpassament per haver ina stgisa de sezs buca stuer observar il contract pervia dils caputschins. Quels restan en diversas pleivs mischedadas e dattan consequentamein bia de sesbatter duront ils suandonts decennis.

La damonda de Tumeagl ei vegnida ventilada el congress della primavera 1672. Ins ha uniu ella cun autras questions confessionalas, cun la restauraziun della claustra de Cazas, cun il plan d'ereger in commissariat papal en Valtina e cun l'alienaziun de dus mattatschs catolics ord ina lètg mischedada a Bivio, menai sul Set en Bergaglia per vegnir educai leu da priedi. Sin la gliesta de tractandas secattavan aunc biaras autras lamentaschuns: Da vart catolica vegn reproschau, ch'ils ded Igis hagian retratg il dretg de burgheis ad ina persuna, mo per quei ch'ella seigi catolica. Sco ils reformai selamentan seigien las relaziuns aschi malemperneivlas, ch'in reformau sappi gnanc secasar leu. Vicendeivlas inculpaziuns e reproschas!

Il settember 1672 fan aunc pli nauschas famas la curella; Heinrich de Schauenstein relata surlunder: Tuts mess e cussegliers catolics dueigien vegnir assassinai a caschun della dieta; igl adversari hagi lu spert era liquidau il pievel senza menaders. — Ina certa agitaziun caschuna ultra de quei la profanaziun della caplutta de S. Glieci sur Cuera. Duront la stad 1672 ei la porta de quei sanctuari vegnida sfraccada, statuas, paramenta e maletgs destrui. Il culpont, in cert Georg Salis, feagl de Vespasian, ei vegnius castigiaus en contumazia cun l'exiliaziun dal territori de tuttas Treis Ligias.<sup>24</sup> Era dalla Val Müstair arrivian cuort suenter grevas lamentaschuns: Ils 29 de settember hagian reformai de S. Maria allontanau in maletg ord la baselgia e destruiu quel. Ei settractavi d'in schenghetg della feglia dil

---

<sup>24</sup> Archiv cantonal Cuera, protocols dellas dietas, tom 38 p. 143.

Archiv episcopal, extracts ord ils protocols dil capetel, digl ordinariat etc. 1661 — 1678, da dr. Ant. de Castelmur p. 55 — 59.

cont Max Trapp. Ils agitatur hagien era smanatschau de destruir igl altar. En quella ovra seigi cunzun il predicant sedistinguius.<sup>25</sup>

Questas fatschentas han occupau quasi tuttas radunonzas, congress e dietas digl onn 1672. Landrächter Clau Maissen era quei onn cau della Ligia grischa ed ei veramein seprius en de catolic per la causa della Baselia; cheutras eis el sefatgs ualti malvesius dals reformai.

Alla dieta generala dil settember 1672 garegian ils reformai *in general engirament della brev della Ligia* e — tenor ils artechels de Glion — l'exclusiun de tuts paders caputschins jasters. Clau Maissen ei seriscudius heroicamein encunter talas pretensiuns.

Ins astga supponer ch'ei settractavi d'engirar la brev della Ligia dil settember 1524, cumpriu ils artechels de Glion, sco anno 1649/50. Ei regeva denton ina certa malsegirezia partenent il text della brev. Ils catolics pretendevan che l'atgna brev cuntegni negins artechels encunter la libertad della Baselia; quels seigien vegni aschuntai per pli tard. Ei para ch'ins era insumma buca propi el clar, tgei text dueigi vegnir engiraus, sescagnava e plidava in sper l'auter ora. Alla fin ein ils mess dellas Ligias i en irritaziun in ord l'auter. Landrächter Capol de Flem e colonel Buol han fatg grevas smanatschas als catolics, mo quels ein semess a cavagl e serendi a casa.<sup>26</sup>

Clau Maissen selamenta sco cau dil Corpus Catholicum della pinta unitad denter ils catolics, ferton ch'ils reformai seigien pli units e searmien. Da vart catolica enqueran ins agid tier Casati. Quel vuleva denton buca rumper cun ils reformai de sia partida e prendeva perquei mai propi clara posiziun pils catolics.

---

<sup>25</sup> Archiv cantonal Cuera, prot. dellas dietas, tom 38 p. 143. Archiv episcopal l. c. p. 61.

<sup>26</sup> Archiv cant. Cuera, prot. d. Dietas, tom 38, pg. 147/148. Archiv episc. l. c. pag. 61 s: «Alli 17 sett. 1672 nella dieta li Protestanti hanno dimandato dalli cattolici che giurino la carta della Legha la qualle e tutta in pregiuditio della religione cattolica et immunità et fra altre cose contiene che tutti li religiosi forastieri siano mandati fuore del paese, il che li cattolici non hanno voluto fare et hanno risposto che il piu tosto si voglino diffender nel meglior modo che ponno. Sopra di che anco le parte hanno fatto grande fracasso et si sono partiti tutti disuniti, et in ciò sopra tutti s'ha deportato heroicamente il moderno Landrächter signor Nicolaus Maissen et al contrario il signor tenente colonelle Buel et sigr. Landrächter Capaulo hanno fatto gran minaccie et questo ultimo per essergli stato contrario msgr. vescovo acciò non possa diventare Landrächter...»



La Ligia della Casa de Diu ha uss priu l'iniziativa e dumandau igl uestg Duri de Mont — gia dapi 10 onns cau diocesan — schebein el seigi prompts d'engirar la brev della Ligia ed ils artechels de 1541. Quels eran vegni stabili dalla Ligia della Casa de Diu ed engirai dagl uestg Glieci Iter a caschun de sia elecziun. Uestg Duri de Mont rispunda alla delegaziun tarmessa ad el: Igl uestgiu ha dau negina caschun de far tuttenina talas pretensiuns; ins ei vivius onns ed onns ora sco buns vischins, e quellas amicablas relaziuns dueigien era cuzzar egl avegnir. El sappi buca dar ina ulteriura risposta avon che secussegljar cul capetel, cul Corpus Catholicum e cul nunzi, essend che la caussa mondi era tier a quellas instanzas.<sup>27</sup>

Gl'auter di ei igl uestg seconferius cul capetelatedral e cun enzacons signurs catolics sco Clau Maissen, Gallus de Mont, Stiafen Muggli, Gieri Scarpatetti, Ferrari ed auters. Igl uestg paleisa als radunai la damonda fatga da vart protestanta. Clau Maissen, il cau dil Corpus Catholicum, pren igl emprem il plaid. El deplora ch'ils catolics vegnan squitschai sin tala moda e protesta encunter la pretensiun digl engirament d'omisduas brevs. Quei fiug seigi ruts ora sulettamein pervia dils caputschins a Tumeigl. Maissen cussegia de discuorer cul pader viceprefect dils caputschins e de supplicar ils Cumins per lur pareri. El drezza era recents plaids encunter Gieri Scarpatteti che hagi susteniu l'istanza dils reformai e schizun participau alla delegaziun tier igl uestg (ensemien cun burgameister Rascher e colonel Planta). Quei seigi scandalus pils catolics. Ils protestants encorschien aschia la disuniun dils catolics e senezegien de quella. Scarpatetti emprova de s'excusar schend ch'ils catolics della Ligia della Casa de Diu hagian sulettamein vuliu far valer lur dretgs aschilunsch che quels restrenschien buca l'immunitad della Baselia. Tschelluisa vegli el haver de far nuot, ni cun la numnada pretensiun, ni cun la delegaziun agl uestg, e protesti era encunter. La conferenza ha rispundiu alla Ligia della Casa de Diu che la libra pratica della religiun seigi garantida ell'entira republica entras la brev della Ligia. Ils catolics hagian la libertad d'eleger ils spirituals che plaigien ad els.

Sin quella risposta ha la Ligia della Casa de Diu tarmess promtamein ina secunda delegaziun silla Cuort e garegiu che ton la brev

---

<sup>27</sup> Archiv episcopal, extracts l. c. p. 63 — 66.



della Ligia sco ils sis artechels vegnien engirai. Sissu concluda la conferenza de delegar landrechter Maissen, capitani de Salis e Ferrari tier igl ambassadur Casati per implorar puspei da quel agid e cussegl. Casati ha tenuu distanza della caussa. Maissen cusseglia alla conferenza de dumandar il pareri dils Cumins, de ceder el cass Tumeagl, essend ch'ins hagi ton sco gia empermess quei, per lu ton pli tgunsch vegnir ina gada alla fin dellas dispetas confessionalas. Autras pretensiuns seigien de refusar energicamein.<sup>28</sup>

Ils 10 d'october ha giu liug ina fetg agitada sessiun denter igl uestg ed il capetelatedral. Igl uestg s'exprima: El hagi udiu ord bunas fontaunas e seigi ultra de quei vegnius avertius, ch'ins vegni ad attaccar igl uestgiu, sche la damonda de Tumeagl e digl engirament dils sis artechels vegni buca sliada en perinadad. Il prevost ed il decan ein d'accord de delegar dus canonis tiel nunzi. E canonis Sgier aschunscha malignamein, ch'il nunzi dueigi u allontanar ils caputschins da Tumeagl u vegnir sez el Grischun e defender ils interess digl uestgiu. Il scolasticus cusseglia d'en scadin cass buc engirar ils sis artechels e dil reminent far sco gia praticau pli baul: fugir a Fürstenburg, metter en salv las scartiras e prender las necessarias mesiras de segirezia. Il prevost ed il scolasticus ein vegni tarmess tiel nunzi per cuost digl uestgiu.<sup>29</sup> La situaziun era daveras prigulusa.

Era duront igl onn 1673 tschessan las scarpanzas buc. La damonda digl engirament piarda denton empau de sia intensitad enviers las ulteriuras dispetas. Ils parochians de Tumeagl vulevan per negin prezi schar partir lur caputschins. Il settember 1673 haveva la discrepanza contonschiu sia culminaziun. Conferenzas e delegaziuns senza fin alteschan da mintga vart, mo senza success. Alla fin ha aunc il cau della Ligia della Casa de Diu che presidiava la dieta a Cuera offendi il catolics, schend ad els en radunonza publica, ch'els tegni buca plaid. Ils mess catolics han pretendiu satisfacziun e declarau de buca vegnir pli allas sessiuns entochen che quella seigi buca dada. Els han era discussionau la damonda de sedistaccar dall'uniun dellas Treis Ligias e fundar ina atgna Ligia. Denton eis ei reussiu a Casati

---

<sup>28</sup> l. c. p. 69 — 92.

<sup>29</sup> l. c. 93 — 95.

de contonscher la suspensium dil conflict per sis meins. En quei interval ei il nunzi sedecidius de prender naven da Tumeagl ils paders, «il crap de scarpetsch e la raschun de tut scandal». Ei ha duvrau leutier igl agid de Casati che ha procurau per 40 filips contribuziun alla pleiv de Tumeagl pil manteniment d'in «buon prete», entochen che la Congregaziun de Propagande fide detti ulteriuras instrucziuns.<sup>30</sup> 1674 vegn in spiritual secular a Tumeagl, numnadamein Martin Arpagaus de Cumbel.<sup>31</sup> La damonda digl engirament ruaussa puspei per enzacons onns; igl ei il ruaus avon il stemprau ch'ei sesalzaus igl onn 1683.<sup>32</sup>

---

<sup>30</sup> Archiv episcopal, Pol. Akten, rapport de Casati, dils 11 de sett. 1674 p. 607.

<sup>31</sup> J. J. Simonet, Die kath. Weltgeistlichen Graubündens p. 186.

<sup>32</sup> Surlunder tracta mia lavur: Der Streit um die Neubeschwörung des Bundes- und Artikelbriefes 1683 — 1697, comparida el Bünd. Monatsblatt 1957, nr. 12.